

पुलिस मुखबिर लोर !

मीवा गलती तुन सुडून आल्साकीर , समझेमायकीर !

भारत ता क्रांतिकारी आंदोलन तुन मापलाय केंद्र ओसो राज्य सरकारकु अल्ला 20 लेंज तल ‘‘समाधान’’ पेदिर ते क्रांतिकारी लड़ाई ता विरोध ते हमला ताकी कीसोर मंता. दीनगडल पुलिस तोर वेरपी किसोर, रक-रकम ता लालच तोहचोरे गति कीसोरे सुगली तोर कुनु तैयार किया मंता.

पुलिस तोरा गति कियना पोल्लो तुन नमिसी ओसो वेरियसी सुडून लोकुर नारायणपुर, कोण्डागांव, जगदलपुर, पखंजूर, कोयलीबेड़ा, प्रतापुर अंजि पुलिस बल ना संगे मंतोर. ओर लोपाडल वेल्लेटोर गरीब मानेय आंदुर. ओरकु माटु जनविरोधी ओसो लड़ाई ता विरोध ता काम तुन विड्चीसि मीवा-मीवा नाहकु ने वासि जीवा तोरा, सगातोरा ओसो जनता ना संगे कलियसी मंजि बेसता पिस्खाल पिस्सिकीर इंजि वेहमंतोम.

मीटु बार किया मुखबिर बनेमातिर ?

क्रांतिकारी आंदोलन गरीब ओसो लूटेमायना जनता ना जल-जंगल, जमीन ओसो अधिकार ना काजे ताका मंता. मावा देश ता जनता ना संपत्ति माल-सोम तुन लूटी कियना, तिष्ठल कियना देश-विदेश ता बेहरा पूँजीवादीरा ओसो बेहरा जर्मादारीरा विरोध ता आंदु. मीटु देश ता विदेश ता बेहरा पूँजीपतिर आयविर, बेहरा जर्मादार-मालगुजारीर आयविर. मीटु बार किया मुखबिर बनेमातिर? औंदि बेरा आल्सकीर!

नार विड़सि मीटु बारकिया वित्तिरीर ?

मावा पार्टी भारत ता कम्युनिस्ट पार्टी (माओवादी) ओसो जनताना सरकार मीवा भूमि पिङंगतया, मीवा कोंदा, कोरकु, संपत्ति तुन बोनकाइ तूसताद मंताया? मीवा लोन बोइस्तोया? आत्केकाई मीटु मीवा जमीन संपत्ति, कोंदा विड़सीसि बार किया वित्ता मंतिर? मीटु सबेटोर मीवा नाहकुने वासि कमाई कीसोरे पिल्ला-पेकोर संगे साधारण पिस्खाल पिस्सीकीर.

पार्टी आई , पीएलजीए आई बेस्केने होंग ते देब्बा हित्ताद मंताया , बेस्केने रांगताद मंताया ?

आयवेके मावा पार्टी ओसो पीएलजीए पोर्टे मीवा होंग तुक

कारण बातल? बेस्केनाई पुकटे गलती तुन तोहची मीकु पिटाई कीतेकाई, रांगतेकाई पार्टी ओसो जनताना सरकार तुक वेहतेके पार्टी, सेना, जनताना सरकार मावा गलती तुन मानेमांतोम. मीट वेने बेस पुंजि मंतिर, गलती कित्तास्के पार्टी गलती मानेमासोरे माफी कीमुट इंजि वेहताद मंता.

मीटु बोन हौकला पुलिस तोर संगे कलियतीर ?

मावा पार्टी, पीएलजीए ते वेल्लाटोर दंडकारण्य भूमि ते पुटता आदिवासीर, गैर-आदिवासी पिल्ला-पेकोर आंदुर. वीरा लोपा उयतुर मीवा जीवा-सगातोर मंतोर. मीवा दादाल-तम्मुर, अक्काल-एलास्क, पीकि-पेकोर, ओरकु हौकलाय मुखबिर बनेमायनादु बेस इंजि मीटु आल्समुंतिरा?

गुलाम लेहका मजदूर लेहका पिस्सनादु मीकु ओप्पिंतया ?

मीटु इदु जल, जंगल, जमीन ता मालिक आंदुर. मति मीकु इगडल पूण्डसी इद संपत्ति तुन कब्जा कियला लूटी वर्गम तोर हूडसोर मंतोर. माटु सबेटोरम एकता ते लड़ेमासोरे इंजे एवनल मावा संपत्ति तुन बचा कित्तोम. इद आंदोलन तुन कमजोर कियला दुश्मन मावा नडुम झगड़ा पुटिट्किया मंतोर. मीकुन मुखबिर बने कीसि आंदोलन विरोध ते निल्पी किया मंतोर. इद आंदोलन कमजोर आतेके इद भूमि ता मालिक लेकका मत्ता मीटु इद भूमि ते बनि ओसो गुलाम लेकका बनेमांतिर. मीटु गुलाम बनेमासि पिस्सानादे बेस इंतीरा?

विस्थापन ओसो विनाशकारी विकास तुन मीटु मानेमांतिरा ?

दण्डकारण्य भूमि ते मत्ता बेचोनो संपत्ति तुन होयलाय खदानकु, रोड ओसो रेल लाईन पंडसोरे वेल्लाटोर किन अपुना भूमि तल पूण्डसी, उयतुर माने कुन नौकरी इयामुंतोर. तेनु मीटु विकास इंजि मानेमांतिरा? इदम ता विकास तुन मुने होयला मुखबिर बनेमासि मीटु लूटी कीवालोरकु मदत हियलाय तैयारासोर मंतिर. दीना कसुम ता अर्थम बाताल? मावा मर्स ते मावा कालकुने नरकानदु. मावा वेड्स्कुने मावा कोण्डा कुन कोहकानादु. लूटी

**सरकार ता साजिश ते शामिल आयनादु गलती आयो या?
मीवा चायास्क , अकास्क एलास्कु
ओसो मेयास्क ना पोर्टो पुलिस
बलकु कियना अत्याचार कुन मीटु
समर्थन हींतिरा? इदम ता अत्याचार
कियना लोपा ओरकिन मदत
हीयकीरा?**

पुलिस बलकु दण्डकारण्य ता तलुर पोर्टो अकाल, एलास्क ओसो मेयास्कुना पोर्टो बेचोनो अत्याचार किया मंतोर. अदम ता पुलिस तोरकुन मुखबिर बनेमासि मीटु मीवा तलुर, अकास्क, एलास्क-मेयास्कुन धोका कीसोर हिल्वीरा? बेस आल्सट मीटु बेदम ता मर्ट आंदुर? बेदम ता दादाल आंदुर? बेदम ता बाबल आंदुर?

**नार विड़चीस अत्ता माने बद्रम ता
पिस्वाल पिस्सा मंतीर?**

पुलिस तोरा झूठ पोल्लो केंजिसि नारायणपुर ओसो अलग-अलग शहर ते अत्ता मुखबिर लोर, गददारीर, जनविरोधी लोरा पिस्वाल बद्रम मंता? ओरा इज्जत लेवा नयकुना लेहका पिस्सना पिस्वाल आत्ता. नार, जीवा एडमी तोरकु जेक आसि आके ईके नयकुना लेक्का वेल्लयसोरे मंतोर. अदमतोरा पोर्टो जनता थू-थू इंजि हूस्का मुंतोर. पुलिस अधिकारिलोरकिन जी हृजुर इंजोरे पिस्सा मंतोर. अदम बेइज्जत ते पिस्सानदु ओंदि पिस्वाले आंतया? मीटु वेंडे इदम पिस्सकाल इंजि आल्समुंतिरा?

**इज्जत ते पिस्सना मौका इंजेके वेने
मीकु मंता!**

पुलिस कैप ते मंजि, पुलिस तोरा संगे वेलियसी तमाय नाटे वालेके माओवादीर हौकीतोर इंजि पुलिस तोर प्रचार कियमंतोर. पुलिसतोरा प्रचार तुन मीटु विश्वास कींतिरा? इदेन मीटु बिल्कुल विश्वास कीमाट. मीट वेने पुतिर गलती मानेमातोरनु बेयतुरनो पार्टी, जनताना सरकार सजा हीवा विड़स्ताद मंता. ओरकुन मुनेटा लेहकने तमा नाहकुने पिस्सला मौका इत्ताद मंता.

नाहकुने मंजि मुखबिर कबड़ कीवालोर मावा माटा केंजेटु - मीटु इदम ता गलत कबड़ तुन विड़चीसि जनताना सरकार मुन्ने गलती तुन होणसि बेस पिस्साकीर. पुलिस कैप ने मंदना मुखबिर लोर मीट वेने अदु कबड़ विड़चीसि, कैप विड़चीसि मीवा नाहकुने

वासि मंदकीर. मीवा गलती समझेमामटु. पार्टी, पीएलजीए, क्रांतिकारी जनताना सरकार मीकु बेदे तिष्पाल कीवो. गददारी लोरा संगे गोति मनमाट! ओरा लोहकुने अनमाट! ओरा ओसो लूटी कियना सरकार तोहना लालच ते फंसेमायमाट. मावा जल, जंगल, जमीन तुन बचा कीसोरे ताना मालिक बनेमासि पिस्सिकीर. **गुण्डादूर लेहकटा महान योद्धालोरा
वारिस बनेमासि पिस्साट !**

जल, जंगल, जमीन इज्जत-अधिकार काजे अन्नीमन्नी जीवा इंजि लडेमासोरे गुण्डादूर, गेंदसिंह, सेडमेक बाबुराव लेहकटा मनवा पडियोर शहीद आत्तोर. दंडकारण्य भूमि ता मरकु-मेयास्कु ओता वारिस आंदुर. मीटु ओरा हरदेने ताकना. मति सुक्कू नरोटी लेहकटा गददारीरा हरदे ताकनायो. महान भूमकाल हरदे ताकसोरे क्रांतिकारी जनताना सरकार ते शामिल आयकाल.

**क्रांतिकारी जनताना सरकार बोना
साटि?**

मीवा लेक्का गरीब तोरा, तिष्पाल मत्तोरा साटिये. लूटी वर्गम तोरा साटी, लूटी वर्गम तोर ताकि कियना लूटी सरकार ता विरोध ते मजदूर, किसान, पेटीबुर्जुआ ओसो राष्ट्रीय बुर्जुआ तोरा संगे संयुक्त मोर्चा लेहका मावा भूमि ते क्रांतिकारी जनताना सरकार बनेमत्ता. इद भूमि ते लूटी वर्ग तोरा लूटी तुन रोमी कीसोरे इदु इगडा जनता तमय काळ्कु ना पोर्टो निल्तना लेहका विकास कियला कोशिश कीसोर मंता. मीवा साटिये आयो मीवा जीवता मरकु-मेयास्क ना बेसता भविष्यत पिस्वाल साटि जनताना सरकार कुन निल्पी कियला, बचा कियला, मजबूत कियला ओसो विस्तार कियला जरूरत मंता.

**अदिनके मुखबिरी कबड़ विड़चीसि
वायकीर.**

मुखबिर बनेमायनायो! मावा माड भूमि तुन कब्जा कियला दुश्मन कुन मदत हीमाट! पार्टी, पीएलजीए, क्रांतिकारी जनताना सरकारकुन नुक्सान कीमाट!

क्रांतिकारी अभिवादन संगे
उत्तर बस्तर डिविजनल कमेटी,
भारत की कम्युनिस्ट पार्टी (माओवादी).